

Somalci u Etiopiji optužuju vladu za zločine

15 februar 2012 Izmijenjeno 12:49 CET

Povodom žalbe ICC-u, somalski aktivisti tvrde da je Etiopija odgovorna za genocid nad Somalcima u regionu Ogaden



Etiopijska vlada tereti se za ubistva, silovanja, mučenja i zatvaranja Somalaca u Ogadenu [Al Jazeera]

Piše: Azzad Essa

Somalci koji žive u etiopijskoj pokrajini Ogaden uložili su žalbu tužitelju Južnoafričke Republike i Međunarodnom krivičnom sudu (ICC), tražeći istragu o navodnim zločinima etiopijske vlade protiv ovog naroda. Žalba se odnosi na bespravna ubijanja i zatvaranja, silovanja, mučenja, nestanke, paljenje sela i uništavanje stoke.

„Južnoafrička Republika je najbolje mjesto u Africi za ulaganje ove žalbe, pogotovo zbog zakona – vjerujemo da se Južnoafrikanci još sjećaju šta su proživjeli tokom apartheida – ono što i mi proživljavamo pod manjinskom vladom u našem regionu“, kazao je za Al Jazeera Mohamed Fadel Abdullahi, somalski aktivista iz Ogadenu koji živi u Johannesburgu. Žalba se sastoji od 700 strana dokaznog materijala. Prema statutu ICC-a, ovaj sud mora razmotriti svaku žalbu i odlučiti da li ima jurisdikciju nad tim slučajem, te da li postoji dovoljno dokaza za istragu. Etiopija nema obaveze prema ICC-u.

'Genocid i zločini protiv čovječnosti'

Abdullahi je kazao da Somalci iz Ogadenu „neće samo podići svijest o nepravdi koja se dešava u regionu, nego i dovesti zločince pred sud pravde, te pomoći nam da zaustavimo genocid i zločine protiv čovječnosti u Ogadenu“. "Južnoafrička Republika ima otvoren pravosudni sistem, koji nam omogućava da koristimo svoje pravo u potrazi za međunarodnom pravdom“, kazao je on.

Ogaden, region u istočnoj Etiopiji u kojem se govori somalski jezik, graniči sa Kenijom, Džibutijem i Somalijom. Smatra se glavnim izvorom napetosti između Etiopije i Somalije. Iako region legalno pripada Etiopiji, njegovi stanovnici su uglavnom Somalci. U Ogadenu se vode borbe i separatističke akcije otkad je Etiopija preuzela ovu teritoriju 1954. Tokom građanskog rata u Somaliji 1991. započeo je drugi val oružanog otpora Ogadenskog nacionalnog fronta oslobođenja (ONLF), formiranog 1984.

Od 2007. godine, na hiljade ljudi je ubijeno, uglavnom civila, tokom borbi etiopijskih oružanih snaga i ONLF-a. Strateška i ekonomska važnost ovog regiona je porasla kada je na ovom mjestu otkrivena nafta.

Krvavi režim

Ogadenska zajednica navodi da je etiopijska armija istjerala civile iz Ogadena, te im oduzela stoku, a na njihovim imanjima započela potragu za naftom. Govoreći pod uvjetom da ostane anonimna, somalski novinar koji živi u Najrobiju kazao je za Al Jazeera da ljudi u Ogadenu „žive pod represijom i krvavim režimom“.

„Mnogi ljudi iz Ogadena su u zatvoru, gdje su mučeni, te čak osuđivani i na smrt. Njihovo stanje je užasno“.

„Na ovom području postoji polu-autonomna vlada koju podržava etiopijska vlada. Ali na nesreću, velika većina Ogadenaca – uglavnom ljudi u dijaspori – ovu vladu smatra pulenom režima“ kazao je on.

Stanovnici Ogadena navode da je 20.000 članova njihove zajednice zatvoreno u 200 zatvora, uglavnom nepoznatih vojnih logora u Etiopiji, gdje je zabranjen pristup Međunarodnom komitetu Crvenog križa. Human Rights Watch (HRW) prošlog mjeseca je izvijestio da je na stotine ljudi u Etiopiji uhapšeno, te da postoji rizik da će biti mučeni. „HRW dobija vjerodostojne izvještaje o neosnovanim hapšenjima i ozbiljnim maltretiranjima civila koji su navodni simpatizeri ONLF-a. Ovi civili su držani u zatvorima u etiopijskom somalskom regionu“, navodi se u svjetskom izvještaju ove organizacije za ljudska prava objavljenom ove godine. Amnesty International također navodi da su zabilježeni izvještaji ozbiljnih kršenja ljudskih prava od strane etiopijske vlade i povezanih oružanih organizacija u somalskom regionu.

Izvor: Al Jazeera